


Ambasadorica Marianne Berezcz imenovana za šeficu OHR-a u Banjaluci



Visoki predstavnik Valentin Inzko izrazio je danas dobrodošlicu novoj šefici regionalnog ureda OHR-a u Banjaluci, mađarskoj diplomatkinji Marianni Berezcz.

“Imajući u vidu njeno ogromno profesionalno iskustvo, drago mi je što ću moći sarađivati sa ambasadoricom Berezcz i pozdravljam njen doprinos radu Ureda visokog predstavnika, kao i naporima BiH da ostvari napredak na putu ka evroatlantskoj integraciji. Ja bih također iskoristio ovu priliku da zahvalim Vladi Mađarske što je omogućila našu buduću saradnju izborom ambasadorice Berezcz za ovu poziciju”, rekao je visoki predstavnik.

Prije angažmana u Bosni i Hercegovini, Marianne Berezcz je bila na poziciji višeg naučnog saradnika pri Institutu za vanjske poslove i trgovinu u okviru Ministarstva vanjskih poslova i trgovine Mađarske. Prije toga, vršila je dužnost zamjenice šefa Misije OSCE-a u Skopju.

Ambasadorica Berezcz počela je sa radom u Ministarstvu vanjskih poslova 1981. godine i od tada je bila na dužnosti u Beču, Moskvi, Madridu i Skopju. Također je vršila dužnost i generalne direktorice u okviru Ministarstva vanjskih poslova u Budimpešti, a u periodu od 2003. do 2007., kao izvanredna i opunomoćena ambasadorica, bila je šefica stalne misije

Mađarske pri OSCE-u.

Ambasadorica Berecz je diplomirala na Državnom institutu (univerzitetu) za međunarodne odnose u Moskvi, a završila je specijalne programe na Fakultetu političkih nauka Univerziteta u Amsterdamu koji se odnose na upravu i administraciju u otvorenom društvu.